

四庫全書

史部

欽定四庫全書

欽定續通志卷五百三十四

循吏傳

元

譚澄

臧夢解

陸壘

許維楨

許楫

田滋

卜天璋

耶律伯堅

段直

溫都爾

楊景行

干文傳

林興祖

觀音努

周自強

白景亮

王良

盧琦

鄒伯顏

劉秉直

許義夫

譚澄字彥清德興懷來人父資榮金末為交城令元兵下河朔以縣來附從攻汴有功年四十移病舉弟資用自代資用卒澄襲為令時年甫十九有文谷水分溉交城田文陽郭帥專其利而堰之訟累歲不能直澄折以理令決堰均其利豪民有持吏短長者察得其主名皆

治以法歲乙未籍民戶有司多以浮客占籍及征賦逃竄殆盡官為稱貸積息數倍民無以償澄入覲因中書耶律楚材面陳其害太宗惻然為免其逋亡民能歸者復三年詔下公私便之壬子復大籍民澄盡削交城之  
不土著者賦以時集世祖還自大理澄進見留藩府凡遣使必命澄偕而以澄弟山代為交城令中統元年擢懷孟路總管會歲旱令民鑿唐溫渠引沁水溉田民用不饑教之種植地無遺利至元中累官陝西四川道按

察使建言不孝有三無後為大民年四十無子宜聽取  
妾為宗祀計從之著為令四川簽省嚴忠範守成都為  
宋將咎萬壽所敗退保子城世祖命澄代之至則焚暴  
骸修焚室賑饑貧集逋亡民心稍安及西南夷羅羅斯  
內附遂以澄為副都元帥同知宣慰使司事比至以疾  
卒世祖嘗與太保劉秉忠論一時牧守秉忠曰若邢之  
張耕懷之譚澄何憂不治哉游顯宣撫大名嘗為諸路  
總管求虎符宣麻澄至中書辭曰皇上不識譚澄耶乃

為顯所舉中書特去之其耿介如此

臧夢解慶元人宋末進士未官而國亡至元十三年從其鄉郡守將內附授海寧知州淮東按察副使王慶之按行至其州見其門無私謁官署蕭然凡有差役皆當其貧富而吏無所預戶口增田疇闢桑柘榆柳交蔭境內政平訟簡為諸州縣最乃舉夢解才德兼備宜擢清要屬江陰饑江浙行省委夢解賑之皆躬至其地人以米所活四萬五千餘人江南行臺御史苟宗道舉其

名上聞除同知桂陽路總管府事尋擢廣西廉訪副使  
故事烟瘴之地行部者多不躬至而夢解遍歷馬遂按  
問賓州藤州兩路官吏置於法者無慮八十餘人又平  
反邕州黃震贓罪及藤州唐氏殺夫罪兩大寃獄大德  
中累遷廣東廉訪使以老病退居杭州後至元元年卒  
夢解博學洽聞為時名儒所著書有周官考三卷春秋  
微一卷嘗自號魯山學者稱為魯山先生同時有陸皇  
者與夢解齊名監察御史鄭鵬南嘗以二人並薦於朝

宦字仁重江陰人也至元間已延舉兵南下宦時年未  
冠而志強氣銳率其鄉人見之論議有合兵遂不涉其  
境已延奏授為同知徽州路總管府事以廉能擢至臺  
憲累遷浙西廉訪使所至以黜職吏洗冤獄為已任嘗  
上章奏免儒役及舉行浙西助役法卒謚莊簡

按夢解  
與陸宦

為政勸課有方然職吏雷冤獄  
元史舊入列傳今移置循吏

許維楨字周卿遂州人至元十五年為淮安總管府判  
官屬縣鹽城及丁溪場有二虎為害維楨默禱于神祠



一虎去一虎死祠前境內旱蝗維楨禱而雨蝗亦息是冬無雪父老言于維楨曰冬無雪民多疾奈何維楨曰吾當再禱已而雪深三尺朝廷聞其事方欲召用未及而卒

許楫字公度太原忻州人年十五以儒生中詞賦選又舉賢良方正孝廉至京師平章王文統命為中書省掾以不任簿書辭改知印一日從省臣立殿下世祖見其美鬚魁偉問曰汝秀才耶楫頰首曰臣學秀才耳未敢

自謂秀才也帝善其對授中書架閣庫管勾兼承發司  
事未幾擢勸農副使時高拱為安西王相遇於途楫言  
京兆之西荒野數千頃宋金皆嘗置屯如募民立屯田  
歲可得穀以贍王府用楫如其言奏行之三年屯成果  
獲其利平章廉希憲行省荆南以楫為左右司員外郎  
荆南父老與金帛求謁楫曰汝等已為大元民今置吏  
來撫汝奚用金帛求見為尋除江西道提刑按察副使  
時招討使郭昂討叛賊董旗縱兵俘掠甚衆楫詢得良

民六百口遣還鄉里改徽州路總管戶部尚書王巨濟倚僧格勢刻剝加徵民鈔已輸二千錠怒其少欲更益千錠楫曰公欲百姓死耶如欲其死雖萬錠可徵也巨濟怒解及考滿去徽屬績溪歙縣民柯三八汪千十等因歲饑阻險為寇行省以兵捕之相拒七月更使人招之三八等曰但得許總管來我等皆降矣行省召楫至楫單騎趨賊壘衆見皆拜曰我公既來請署榜以付我楫白行省請退軍一舍俟其歸命參政高興如其計賊

果降以東平路總管致仕至元二十六年卒

田滋字榮甫開封人世祖至元二年由汴梁路總管府  
知事入為御史臺掾十二年拜監察御史會宋亡滋建  
言江南新附民情未安加以官吏侵漁宜立行御史臺  
鎮之詔從其請超拜行臺侍御史大德二年累遷浙西  
廉訪使有縣尹張或者被誣以贓獄成問之但俛首泣  
不語滋大疑明日齋戒詣城隍祠禱曰張或坐事有冤  
狀願神相滋明其誣守廟道士進曰曩有王成等五人

同持誓狀到祠焚禱火未盡而去爐中得其遺薰今藏壁間豈其人耶視之果然明日詣憲司詰成等不服出火中誓狀示之皆驚愕伏辜或遂得釋十年改陝西行省參知政事時亢旱久道過西嶽因禱曰滋奉命來參省事安西不雨者三年矣民饑死滋將何歸願神降甘澤以福黎庶列官果大雨滋即以倉麥給小民之無種者俾來歲收成以償官民大悅未幾卒贈開封郡公謚

莊肅

卜天璋字君璋洛陽人父世昌仕金為河南孔目官憲宗南征率衆歛附授真定路管民萬戶籍河北民徙河南者三千餘人俾專領之遂家汴天璋少負氣至元中為南京府史時河北饑民數萬人集河上欲南徙詔勿許衆洶洶不肯還天璋慮其生變勸總管張國寶聽其渡國寶從之遂無事河南按察副使程思廉察其賢辟為憲史後為中臺掾有侍御史倚勢貪冒御史發其贓天璋主文牘未及奏顧為所譖同被逮御史對食悲哽

天璋曰死職義也奈何為兒女子泣耶御史慙謝俄見  
原免丞相順德王當國擢掾中書為提控事有可否必  
力辨他相怒天璋言不置王竟從其議大德四年為工  
部主事蔚州有劉帥者豪奪民產吏不敢決省檄天璋  
往詢之帥服田竟歸民武宗時累遷刑部郎中適盜賊  
充斥時議犯者并家屬咸服青衣巾以別民伍天璋曰  
赭衣塞路秦弊也尚足法邪議乃止仁宗召入見時興  
聖太后在座帝指曰此不貪賄卜天璋也因問今何官

對曰臣待罪刑部郎中復問誰薦者對曰臣不才誤蒙  
擢用帝曰先朝以謝仲和為尚書卿為郎中皆朕親薦  
也皇慶初出為歸德知府勸農興學復河渠民始免河  
患羣盜據要津商旅不通天璋擒百餘人磔以徇盜遂  
息擢浙西道廉訪副使以更田制改饒州路總管既至  
聽民自實事無苛擾版籍以清縣以饑告天璋即發康  
賑之僚佐持不可天璋曰得請而賑民且死矣失申之  
責吾任其咎民賴全活火延饒之東門天璋具衣冠向



火拜勢遂熄鳴山有虎為暴移文山神立捕獲之以治  
行第一擢廣東廉訪使先是豪民瀕海築堰專商舶射  
利有司以賂置不問天璋至發卒決去之嶺南地常燠  
至是始冰人謂政化所致云尋乞致仕天歷二年蜀兵  
起荆楚大震復拜山南道廉訪使或疑其老不果行天  
璋曰國步方艱吾年八十恒懼弗獲死所敢避難乎遂  
行時穀價翔湧乃下令勿損價聽民自便於是舟車爭  
集米價頓減復止憲司贓罰庫緡錢不輸於臺用賑饑

者會詔三品官言政因列上二十事凡萬餘言目之曰  
中興濟治策皆中時病以老引去既歸汴以餘祿施其  
族黨家無甌儲處之晏如也至順二年卒贈河南郡侯  
謚正獻

耶律伯堅字壽之桓州人氣豪俠喜與名士游用薦舉  
入官為工部主事世祖至元九年轉清苑縣尹初安肅  
州苦徐水為患訴於大司農欲奪水故道導之使東入  
清苑境伯堅陳其形勢圖其利害謂果導則清苑徒被

潦沒而水必反故道為災請大司農司官及郡守行視  
可否事遂已縣西有塘水溉田甚廣勢家據以為磴民  
以失利來訴伯堅命毀磴決其水注之田許以溉田之  
餘月仍得堰水置磴為定制縣居南北之衝歲為親王  
大官供張於縣西限以十月成至次年復撤而新之吏  
得並緣侵漁伯堅命築公館以代其弊遂絕凡郡府賦  
役於縣有重於他縣者輒曰寧得罪於上不可得罪於  
下必詣府力爭之在清苑四年民親之如父母比去立

石頌其德馬擢為恩州同知

段直字正卿澤州晉城人至元十一年河北河東山東盜賊充斥直聚黨族結壘自保世祖命將畧地晉城直以其衆歸之幕府承制署直潞州元帥府右監軍其後論功行賞分土世守命為澤州長官澤民多避兵未還者直命籍其田廬於親鄰人戶且約曰俟業至至當折之以歸逃民間之多來還者命歸其田廬如約素無產者出粟賑之為他郡所俘掠者出財購之以兵死而暴

露者收而瘞之未幾澤為樂土大修孔子廟割田千畝  
置書萬卷迎儒士李俊民為師以招延四方來學之士  
不數年士子以通經被選者百二十有二人在官二十  
年多有惠政朝廷特命提舉本州學校事未拜而卒  
溫都爾字瑞芝喀喇氏祖阿爾斯蘭嘗從阿珠伐宋仕  
至興寧路達嚕噶齊子孫因其名以蘭為氏溫都爾通  
經史兼習諸國語成宗時為翰林院札爾里克齊職書  
制誥會有旨命書藩王添力之旨溫都爾曰此旨非惟

有虧國體行且為民殃矣帝聞之曰小吏如此真難得也事乃止除遼州達嚕噶齊以政聞至順初遷襄陽路達嚕噶齊山西大饑河南行省恐流民入境為變檄守武關溫都爾驗其良民輒聽其度關吏曰得無違上命乎溫都爾曰吾防姦耳非仇良民也可不開其生路邪既又煮粥食之所活數萬人城臨漢江歲被淹沒為築堤城外水患遂息元統二年除益都路總管俗頗悍黠溫都爾務興學校以平易治之有上馬賊白晝劫人久

不能捕溫都爾生擒之其黨賂宣慰吏誣以枉勘縱之  
去已而賊劫河間復被獲乃盡輸其情誣始白俾再任  
一考親王邁努鎮益都其府屬多病民溫都爾裁抑之

民以無擾至正六年卒

按武夷山志云溫都爾行省左丞實都子也嘗為福建道宣慰

副使建城泉亭於御茶園本傳未載

楊景行字賢可吉安太和州人登延祐二年進士第授  
會昌州判官民素不知井飲汲河流每多疾癘且不知  
陶瓦止以茅覆屋所在多火災景行教民穿井以飲陶

及以代茅茨民始免患豪民十人號十虎害民悉捕寘  
之法更創學舍禮師儒勸民出腴田膳士絃誦之聲頗  
盛轉宜黃縣尹升撫州路總管府推官以法繩豪民陶  
甲徙五百里外豪僧雲住發人冢墓取財物景行急按  
之僧賂當道者以危語撼之一不顧卒治如法歷歸安  
縣尹所至皆有惠政以翰林待制致仕卒

干文傳字壽道平江人少嗜學有聲用舉者為吳及金  
壇兩縣學教諭登延祐二年進士授同知昌國州事累



遷長洲烏程知縣婺源吳江知州文傳所至俱有善政  
始至昌國即能柔之以恩信頑獷之民為變俗鹽場官  
倚轉運司勢虐使州民家業破蕩文傳語同列並為陳  
理上官莫能奪民賴以安長洲為文傳鄉邑文傳徙榻  
公署無事未嘗輒出而親舊莫敢通私謁會創行助役  
法凡民田百畝令以三畝入官為受役者之助文傳既  
專任其縣事而行省又以無錫州及華亭上海之事委  
馬文傳諭豪家大姓以腴田來歸中人之家自是不病

於從在烏程日發富民張甲之妻王逐妾殺兒獄浙西  
廉訪司俾文傳鞠丹徒縣民殺姊獄並伏其辜婺源之  
俗男女婚聘後富則渝其約有育其女至老死不嫁者  
親喪貧則不舉有停其柩累數世不葬者文傳下車即  
召耆老使以禮訓告之閱三月而婚葬俱畢宋大儒朱  
熹故業為豪民所占文傳諭其民以理為悉歸之即其  
故宅基建祠俾朱氏世守焉至正三年召赴闕預修宋  
史擢集賢待制旋以嘉議大夫禮部尚書致仕卒

按文  
傳所

至有善政更能以禮勸民婚葬崇儒勵俗  
不媿循良元史舊入列傳今移置循吏

林興祖字宗起福州羅源人至治二年進士授同知黃  
巖州事三遷知鉛山州鉛山素多造偽鈔者豪民吳友  
文為之魁遠至江淮燕薊莫不行使姦黠悍鷙藉以致  
富更分黨數十為吏於有司伺有欲告者輒先証以事  
前後戕人甚衆民銜寃不敢訴興祖至曰此害不除何  
以牧民即張榜禁偽造者且立賞募民首告俄有告者  
至佯以不實斥去又有告獲偽造二人并贓者鞠之款

服友文自至官營救興祖命併執之須臾來訴友文者  
百餘人擇其重罪一二事鞠之獄立具逮捕其黨悉寘  
之法政聲籍甚至正八年擢道州路總管行至城外獐  
賊將迫城時湖南副使哈喇特穆爾屯兵城下聞賊至  
以乏軍需欲退兵興祖夜詣說留之哈喇特穆爾曰明  
日得鈔五千錠桐盾五百乃可破賊興祖許之明日入  
視事即勸諭鹽商貸鈔且取郡樓舊桐板為盾日中皆  
備哈喇特穆爾喜遂留為防禦計賊聞新總管甫抵任

一日具五百盾疑大軍至中夕遁去永明縣洞瑤屢竊  
發興祖以手榜諭之皆曰林總管廉而愛民不可犯  
也三年不入境春早蟲食麥苗興祖為文禱於天大雨  
三日蟲死而麥稔已而罷興作賑貧乏輕徭薄斂郡中  
大治以年老致仕終於家

觀音努字志能唐古氏世居新州登泰定四年進士第  
由戶部主事再轉知歸德府廉明剛斷發摘如神民有  
銜寃不直者雖數十年前事皆千里奔走來訴立為剖

決彰德富商任某抵睢陽驢斃令郝某剖之任以怒毆  
郝經宿死郝有妻王氏妾孫氏妾孫氏訴於官官吏  
納任賄謂郝非傷死反抵孫罪王來訴寃觀音勢即破  
械出孫於獄呼府胥語之曰吾為文具香幣若為吾以  
郝事禱諸城隍神令神顯告有睢陽小吏畏其嚴明且  
懼神顯赫乃以任所賂鈔陳首於是任始伏罪又寧陵  
豪民楊某夙覲王某田不能得值歲饑王攜妻就食淮  
南得疾死其妻還則田已為楊據訴之官楊偽作文券

曰王在時已售觀音勢令王妻挽楊同就崔府君神祠  
質之楊懼先期以羊酒浼巫祝神勿泄及詣祠相質果  
無驗觀音勢疑之名巫詰問巫吐實因訊得其情坐楊  
罪歸其田王氏責神而撤其祠官至都水監

周自強字剛善新渝州人好學能文練於吏事以文法  
推擇為吏泰定間廣西洞徭反自強往見徭酋說以禍  
福立為罷兵貢方物納款歸命事聞起授廣西兩江道  
宣慰司都事遷婺州路義烏縣尹周知民情而性度寬

厚不為刻深民以爭訟訴者一見即知其曲直然未遽  
加以刑責必反覆開譬之若能悔悟即原其罪迷謬不  
悛然後繩之以法民畏且愛獄訟頓息民間田稅之籍多  
失實以故差徭不平自強出令履畝曩之民不能欺賦  
役均平貧富樂業部使者數以廉能譽於朝選授金谿  
縣尹以江州路總管致仕

白景亮字明甫南陽人明法律善成算由征東行省譯  
史累擢衢州路總管先是為郡者於民間徭役不盡校



田畝為則吏得高下其手貧弱不能勝者多破產失業  
景亮知其弊始覈驗田畝役之輕重一視田之多寡民  
不勞而事集他郡邑皆取以為法郡學從祀諸賢無塑  
像諸生無廩給祭服樂器有缺景亮皆為備之儒風大  
振性廉介自奉甚薄妻尤儉約惟以脫粟共飯部使者  
上其事特詔褒美改台州路總管卒於官

王良字止善紹興諸暨人尚氣節務明理以致用不苟  
事言說累遷江浙行省掾史會復立諸市舶司良從省

官至泉州建言買舊有之船付舶商則費省而工易集且可絕官吏掊克弊中書省如其言凡為船六艘省官錢五十餘萬緡歷建德縣尹除兩浙都轉運鹽使司經歷紹興路總管王克敬以計口食鹽不便嘗言於行省未報及克敬為轉運使集議欲稍損其額以紓民力衆謂成籍不可改良毅然曰民實寡而強賦多民之錢今死徙已衆矣顧重改民籍而輕棄民命乎且浙右諸郡商賈輻輳未嘗以口計也始定議歲減紹興食鹽五千

六百引運海道漕運都萬戶府經歷紹興官糧入海運者十萬石城距海十八里歲拘民船備短送至海次主運者又不即受多致耗缺良曰運戶既有官賦之直何復為是紛紛也乃責運戶自載糧入運船船為風所敗者當覈實除其數移文往返連數歲不絕良取吏牘披閱即除積糧五萬二千八百石鈔二百五十萬緡遷江浙行省檢校官有詣中書訴松江富民包隱田土沙場為糧一百七十餘萬石鈔五百餘萬緡宜設官追取中

書移行省議遣官驗視而松江獨當十九艮至松反覆  
破其誑謂言者不過欲竦朝廷之聽而報宿怨且冀創  
立衙門為微名爵計耳萬一民心動搖患生不測豈國  
家培養根本之策事遂寢除江西行省左右司員外郎  
安福有小吏誣民包隱田租九千餘石前後株連至千  
家數遣官按問無實有司喜事復勒民銀合徵糧六百  
餘石艮言是州之糧比原額已增豈復有欺隱詭寄者  
行省用其言悉蠲之在任歲餘以淮東道宣慰副使致

仕卒

盧琦字希韓惠安人登至正二年進士第遷永春縣尹  
始至賑饑饉止橫斂均賦役減口鹽一百餘引蠲包銀  
權鐵之無徵者已而訟息民安復新學宮延師儒以課  
子弟月書季考文風翕然鄰邑仙遊盜發琦適在邑境  
盜遙見之迎拜曰此永春大夫也為大夫百姓者何幸  
乎吾邑長以暴毒驅我故至此耳琦因立馬開喻眾皆  
投刃槩請縛其首以自新琦許之首至琦械送帥府自

是威行境外泉郡饑民多就食永春琦命分諸浮屠及  
大家使食之存活不可勝計安溪寇數萬人來襲永春  
琦召邑民諭之曰汝等能戰則與之戰不能則我當獨  
死衆皆感憤爭奮琦率以攻賊大敗之賊復傾巢而至  
大小三十餘戰賊大衄遁去時兵革四起列郡洶洶不  
寧獨永春晏然無異承平日尋調寧德縣尹遂去官  
鄒伯顏字從吉高唐人初為崇安縣尹崇安田分五十  
都額糧六千石大家田跨數都以五十餘家而兼五千

石細民糧僅升合以四百餘家而合一千石有司常以四百之細民配五十大家之役貧者受役家立破伯顏取糧籍分計悉以糧之多少受役貧民始得休息邑有宋趙抃所鑿溝溉田數千畝歲久溝湮而田廢伯顏修長溝十里繞楓樹陂悉復故跡而田得常稔安慶路得造偽鈔者遣卒械囚至求其黨囚與卒結謀將肆虐良民家伯顏捕訊得其狀即執而歸諸安慶自是偽鈔之連逮無濫及者行省帥府御史憲府咸舉其能調漳州

路判官

劉秉直字清臣大都武清人至正八年為衛輝路總管多異政賊劫汲縣民張聚鈔并殺之日久不獲秉直具詞致禱城隍祠而使人伺於死所忽有村民戰怖仆地具言賊姓名及所在命尉襲之果得賊於汴遂正其罪秋七月蟲螟生復禱於八蜡祠蟲皆自死天不雨禾且稿又詣城北倉峪神祠祈祝有青蛇蜿蜒而出觀者異之行方數里雷雨大至秩滿以親老去



許義夫碭山人為夏邑縣尹每親詣鄉社教民力穡見民勤者出已俸賞之惰者示以罰三年之間境內饒足後調封邱尹至正四年大饑盜賊羣起抄掠州縣義夫聞賊至近境即單馬出迎之語曰封邱邑小而貧民已驚竄幸無入吾境言辭懇款賊遂他往縣賴以安

欽定續通志卷五百三十四

欽定四庫全書

欽定續通志卷五百三十五

酷吏傳

臣等謹案酷吏傳祇唐書金史有之五代宋遼元諸史中並無其傳或亦善善從長惡惡從短之意茲仍其闕

唐

索元禮

來俊臣

來子珣  
邱神勳

周興

侯思止

王弘義

郭弘霸

姚紹之

周利貞

王旭

吉温

羅帝爽

崔器

毛若虛

敬羽

索元禮為人天性殘忍初徐敬業起兵武后患人心異  
己欲大誅殺以威之乃盛開告密之門元禮揣旨因告  
密召對擢游擊將軍令即洛州牧院推案制獄遂作訊

囚酷法或以鐵籠較囚首

按通鑑作以鐵圍較其首胡  
三者注云較急束也舊書亦

作較新傳訛  
作犖今改

加以楔至腦裂死或橫本闕手足轉之號

鳳凰曬翅或倒懸縋石於頭推一人輒牽聯至數百未能訖衣冠震懼后復數召見賞賜以張其威凡論殺數千人於是來俊臣周興踵起天下謂之來索薛懷義始貴元禮養為假子故为后所信後以苛猛復受賂后欲厭衆望乃收下吏不服吏曰取公鐵籠來元禮服罪死獄中

來俊臣京兆萬年人父操博徒也與里人蔡本善本負

博數十萬不能償操因納其妻先已娠而生俊臣冒其  
姓天資殘忍喜反覆不事生產客和州為姦盜捕送獄  
即於獄中上變刺史東平王續按訊無狀杖之百天授  
中續以罪誅俊臣上書得召見自陳前上琅邪王冲反  
狀為續所抑武后以為忠累遷侍御史數按詔獄稱旨  
后陰縱其慘脅制羣臣前後夷千餘家生平有織介皆  
入於死拜左臺御史中丞中外以目俊臣乃引侯思止  
王弘義郭弘霸李仁敬康暉衛遂忠等陰集無賴百輩

使飛語誣蟻公卿每擿一事千里同時輒發契驗不差  
皆署牒曰請付來俊臣推勘必得后信之詔於麗景門  
別置推事院敕俊臣等額按百不一貸俊臣與其屬朱  
南山萬國俊作羅織經一篇具為支脉綱由按以從事  
俊臣鞠囚不問輕重多注醢於鼻禁地牢中或寢之糞  
穢並絕其糧囚至齧衣絮以食非死不得出每赦令下  
必先殺重囚乃宣詔又作大枷有定百脉喘不得突地  
吼著即承失魂膽實同反反是實死猪愁求即死求破

家等名後又以鐵為冒頭被枷者宛轉地上少頃而絕  
凡囚至先布械於前示之莫不震懼皆自誣服如意元  
年大臣狄仁傑任令暉李游道袁智宏崔神基盧獻等

按舊書所載與仁傑同被羅告者六人與此皆同而通鑑則載俊臣羅告知古狄仁傑裴行本崔宣禮盧獻魏

元忠孝嗣真七族謀反 皆被誣下獄俊臣既以夷誅大臣為功乃

奏囚降制一問而服者同首法得減死及脅仁傑等反  
仁傑即承反是實乃稍寬之仁傑因得遣子光遠持帛  
書稱枉后見愕然遣通事舍人周緄往視緄懼俊臣不

敢以聞俊臣又詐為仁傑等謝死表使緝奏之先是宰相樂思晦為俊臣夷其家有子九歲没入司農上變得召見言俊臣凶慘罔上不道若陛下擇朝請中素所信者假條反狀以付俊臣亦無不承反矣臣父死族夷不求生但惜陛下法為俊臣所弄耳后意解由是仁傑六族皆免又按大將軍張虔勗內侍范雲仙虔勗不堪枉訟於大理徐有功俊臣使衛士亂斫之雲仙自陳冤苦命截其舌皆即死

按通鑑張虔勗以天授二年被殺范雲仙以長壽二年坐私謁皇嗣腰斬



新書本傳彙作一時事又以雲  
仙被俊臣截舌而死所載互異  
人人脅息久之俊臣納

賈人金為御史

舊書作  
衛史

紀履忠所劾下獄當死后忠其

上變得誅免為民長壽中選授殿中丞又坐贓貶同  
州參軍暴縱自如奪同僚妻又辱其母俄召為合宮尉  
擢洛陽令進司農少卿聞吐蕃酋阿史那斛瑟羅有婢  
善歌舞令其黨告以謀反而求其婢諸蕃長數十人割  
耳髡面訟冤僅得解綦連耀等有異謀吉頊以白俊臣  
殺數十族欲擅其功即中頊以法頊懼求見后自直乃

免又誣司刑史樊戩以謀反誅其子訴闕下有司無敢  
治因自刳腹秋官侍郎劉如璿為流涕俊臣奏與同惡  
如璿自訴年老而涕吏論以絞后為宥死流漢州初王  
慶詵女適段簡而美俊臣奪之河東衛遂忠有詞辯與  
俊臣有舊它日詣之俊臣方與妻族宴集閤者不肯通  
遂忠直入嫚罵俊臣耻妻族見辱命毆遂忠自此有隙  
俊臣以羣臣不敢斥己乃有異圖常自比石勒欲告皇  
嗣及廬陵王與南北衙謀反遂忠發其謀始俊臣屢掎

撫諸武二張太平公主等過皆恐懼至是共證其罪有  
詔斬於西市人皆相慶競割其肉須臾而盡籍沒其家  
時有來子珣周興者皆萬年人永昌初子珣上書擢在  
臺監察御史無學術語言蚩惡后倚以按獄多希旨故  
賜姓武字家臣既誣雅州刺史劉行實弟兄謀反已誅  
又掘其先墓得遷游擊將軍常衣錦半臂自異俄流死  
愛州興少習法律自尚書史稍遷秋官侍郎屢決制獄  
妄殺數千人武后奪政拜尚書左丞上疏請去唐宗正

屬籍時左史江融有美名興誣融與徐敬業同謀斬於市天授中人告子珣興與邱神勣謀反詔來俊臣鞠狀興未知被告方對俊臣食俊臣曰囚多不服奈何興曰易耳內之大甕熾炭周之何事不承俊臣曰善命取甕且熾火徐謂興曰有詔按君請嘗之興駭汗叩頭服罪詔誅神勣而流興嶺表在道為讐人所殺神勣者行恭子為左金吾衛將軍高宗崩后使害章懷太子於巴州歸罪神勣下遷疊州刺史俄復故官佐俊臣等為慘獄

遂見倚愛博州刺史琅邪王冲起兵拜神勣清平道大  
總管討之州人殺王素服出迎神勣盡殺之凡千餘族  
即拜大將軍天授二年以罪伏誅

侯思止雍州醴泉人貧窮不治生業為渤海高元禮奴  
詭譎無賴恒州刺史裴貞答吏吏怨教思止告貞與舒  
王元名謀反周興鞠之皆夷宗拜思止游擊將軍元禮  
懼引與同坐密教曰上不次用人如問君不識字宜對  
獬豸不學而能觸邪陛下用人安事識字無何后果問

思止以對后大悅天授中遷左臺侍御史元禮又教以君無宅上必賜所浚逆人第宜辭曰臣疾逆臣不願居其地既而果假之以其教對后益喜思賞良渥思止本人奴言語俚下嘗按魏元忠曰亟承白司馬不爾即喫孟青棒蓋洛陽有白司馬坂將軍有孟青棒即殺琅邪王冲者元忠不承思止怒曳之元忠亦怒罵曰侯思止欲得我頭當鋸截之無抑我承反汝位御史當曉禮義而曰白司馬孟青是何物語非我孰教爾思止驚汗起

謝曰幸蒙公教獄稍挺思止音吐鄙而訛人效以為笑  
侍御史霍獻可數斬之思止怒以聞后責獻可獻可具  
奏其鄙語后亦大笑思止奏請娶趙郡李自挹女事下  
宰相李昭德執不可曰俊臣往劫王慶詵女已辱國此  
奴復爾邪撈殺之

王弘義冀州衡水人素無行遊趙貝見閭里耆老作邑

齋遂以反告殺二百餘人

據通鑑  
增輯

遂擢游擊將軍再遷

左臺侍御史與來俊臣競慘刻暑月繫囚別為狹室積

蒿施壘罽其上俄頃輒死自誣乃舍之它獄每移檄州  
縣所至震懼輒自矜曰我文檄如狼毒野葛矣始賤時  
從鄰舍求瓜不與乃狀言園有白兔縣為集衆捕逐畦  
藏無遺內史李昭德曰昔聞蒼鷹獄吏今見白兔御史  
延載初俊臣貶弘義亦流瓊州自矯詔追還事覺會侍  
御史胡元禮使嶺南次襄州按之弘義歸窮曰與公氣  
類持我何急元禮怒曰吾尉洛陽而子御史我今御史  
子乃囚何氣類為杖殺之



郭弘霸舒州同安人

舊書作  
廬江人

為寧陵丞天授中應革命

舉得召見自陳往討徐敬業臣誓抽其筋食其肉飲其  
血絕其髓武后大悅授左臺監察御史時號四其御史  
再遷左臺侍御史魏元忠病僚屬省侯弘霸後入憂見  
顏色請視便液驗疾輕重即染指嘗之賀曰甘者病不  
瘳今味苦當愈元忠惡其媚暴語於朝嘗按芳州刺史  
李思徵不勝楚毒而死後屢見思徵為厲命家人禳之  
俄見思徵從數十騎至曰汝枉陷我今取汝弘霸惶怖

援刀自剄腹死頃而蛆腐是時大旱弘霸死而雨又洛陽橋久壞至是成后問羣臣比在外有何佳事司勳郎中張元一對曰比有三慶旱而雨洛橋成弘霸死

姚紹之湖州武康人初以鸞臺典儀累遷監察御史中宗時武三思僭亂王同皎張仲之祖延慶等謀殺之事覺捕送新開獄詔紹之與左臺大夫李承嘉按治初欲直其事會敕宰相李嶠等同訊諸相畏三思佯不問又數附承嘉耳語紹之遂翻然曳囚送獄中卒誣以謀反

皆論族囚等已誅紹之益傲岸朝野側目擢左臺侍御史奉使江左過汴州廷辱錄事參軍魏傳弓久之傳弓為監察御史而紹之坐贓詔傳弓按之獄具得贓五百萬法當死韋后女弟救請減死貶瓊山尉俄逃還京萬年尉捕之擊折其足更授南陵令員外至開元中為括州長史同正不得與州事死

周利貞者亡其系武后時調錢塘尉神龍初累擢侍御史附權要五王等疾之出為嘉州司馬武三思亂禁中

五王謀誅之私語崔湜湜反告三思五王貶湜勸速殺之以絕人望問誰可使以利貞對利貞湜內兄也表攝右臺侍御史馳嶺外矯殺敬暉桓彥範袁恕已還拜左臺御史中丞數為仇人狙報幾不免先天初為廣州都督湜陷劉幽求謫之嶺表諷利貞殺之賴桂州都督王峻護之獲免利貞頗事剝割夷獠苦其殘虐皆起為寇詔監察御史李全交按問得贓狀貶涪州刺史開元初詔利貞及滑州刺史裴談饒州刺史裴栖貞大理評事

張思敬王承本華原令康暉侍御史封詢行判官張勝  
之劉暉楊允衛遂忠公孫琰廣州司馬鍾思廉皆酷吏  
宜終身勿齒尋復授珍州司馬明年授夷州刺史黃門  
侍郎張廷珪執奏命遂寢未幾復授黔州都督加朝散  
大夫廷珪又表還制書曰利貞險薄小人附會三思傾  
危朝廷殺害功臣人神憤惋當加重貶今反擢典要藩  
繇六品遷三品何賞罰之紊玄宗乃止會廷珪罷起為  
辰州長史朝集京師與魏州長史敬讓皆奏事讓越次

而奏訟父暉寃乃詔貶利貞邕州長史未幾賜死梧州

王旭侍中珪孫

舊書作  
曾祖珪

神龍初為兗州兵曹參軍時張

易之誅而兄昌儀先貶乾封尉旭斬其首送東都遷并

州錄事參軍長史周仁軌韋后黨也玄宗平內難有詔

誅之旭不待覆斬首齎還京師累遷左臺侍御史崔湜

敗其婦翁盧崇道貶嶺外逃歸東都為讐家所發詔旭

訊覆旭捕其親黨窮極慘楚當以重辟崇道及三子皆

死門生故人並海內名士皆絳染流徙天下寃之旭與

御史大夫李傑不平更相傾訐傑坐斥衢州刺史旭益橫殘毒以逞官數遷常兼御史人莫敢與忤製獄械率殘酷脅囚無不承時監察御史李嵩李全交皆以武健取名與旭埒京師號三豹宋王憲府掾紀希虬兄為劔南令坐賊旭奉使臨訊見其妻美逼亂之因殺其夫而納贓數百萬希虬使奴為臺傭事旭旭不知頗愛任之奴盡疏旭請求積數千以示希虬希虬泣訴於王王為上聞詔劾治獲姦賊不貨貶龍川慰恚而死

吉溫宰相頊弟琚之孽子也性陰詭諂附貴宦天寶初  
為新豐丞時太子文學薛稷得幸引溫入見玄宗目之  
曰是丞不良罷之蕭炁為河南尹御史遣溫到府有所  
訊詰乃并治炁右相李林甫善炁乃得免炁入守京兆  
尹而溫方調萬年尉時高力士間出就第炁多私謁溫  
乃先往與力士語執手歡甚將出炁通謁見之歎伏它  
日謁炁辭曰國家法不敢隳今而後洗心事公炁復與  
盡歡林甫與李適之張垆有隙適之領兵部而垆兄均



為侍郎林甫密遣吏撻其銓史偽選六十餘人帝命京兆與御史雜治累日情不得寔使溫佐訊溫分囚於廷左右中取二重囚訊之後舍楚械榜掠皆呻呼不勝曰公幸留死請如牒乃挺出諸史懾其酷及引前不訊皆服日中獄具林甫以為能林甫久當國陰構大獄除不附已者引溫居門下與錢塘羅希夷鍛鍊詔獄希夷文深其舅鴻臚少卿張博濟林甫壻也以姻家故自御史臺主簿再遷殿中侍御史初溫因中官納其甥武敏一

女為盛王妃擢京兆士曹參軍林甫欲搖東宮左驍衛  
參軍柳勣影會發杜良娣家陰事温按狀勣以誣誅因  
引勣所善王魯王修己盧寧徐徵悉逮縛論死中書舍  
人梁涉道遇温低帽障面温怒乃諷勣引涉及嗣虢王  
巨皆斥逐林甫惡楊慎矜中丞王鉷亦嫉之因構慎矜  
私蓄圖讖林甫委温以獄温馳至東都捕楊氏並捕慎  
矜客史敬忠於汝州脅之為證慎矜以左證具欲自誣  
而讖不得御史盧鉉索其家挾讖以入於是慎矜兄弟

皆賜死株連數十族是時溫與希奭相勗以虐號羅鉗  
吉綱公卿見者莫敢耦語林甫倚為爪牙擢溫戶部郎  
中兼侍御史楊國忠安祿山方尊寵高力士居中用事  
溫皆媚附之兄事祿山嘗密諗曰李右相雖厚待公然  
不引公共政公若薦我為相我處公要任則右相可擠  
矣祿山大悅亟稱溫才天子亦忘前語於是祿山領河  
東節度表溫自副并知節度營田管內採訪總留事兼  
鴈門太守知安邊鑄錢事以母喪解祿山奏復本官又

表為魏郡太守楊國忠當國引拜御史中丞兼京畿關  
內採訪處置使溫辭祿山祿山令累路館驛設白紬帳  
以候之又令慶緒出餞溫銜其德故朝廷動靜輒報天  
寶十三載祿山入朝領閑廐使薦溫武部侍郎以為副  
國忠與祿山爭寵而溫昵祿山甚國忠不善也會河東  
太守韋陟失職因溫以交祿山國忠遣人發其狀斥溫  
澧陽長史明年溫又坐受賕及奪民馬貶端溪尉始林  
甫死希奭出為始安太守溫既謫又依希奭逗遛始安

國忠奏遣蔣沆臨按希奭擅稽罪人貶海康員外尉俄遣使者殺溫等

崔器深州安平人曾祖恭禮尚館陶公主器有吏幹而陰刻樂禍天寶中舉明經為萬年尉踰月擢監察御史中丞宗渾為東畿採訪使引為判官渾坐贓敗器亦廢後為奉先令安祿山陷京師器受賊署守奉先渭上義兵起器大懼乃毀偽符敕募衆應之渭上軍敗遂走靈武素善呂諲得為御史中丞戶部侍郎肅宗至鳳翔兼

禮儀使二京平為三司使器草定儀典令王官陷賊者  
悉入舍元廷露首請罪器既殘忍希帝旨欲深丈繩下  
乃建議陳希烈達奚珣等數百人皆抵死李峴執奏乃  
以六等定罪多所原貸後蕭華自賊中來言王官為安  
慶緒驅脅至相州聞廣平王宣詔釋希烈等皆相顧愧  
悔及聞崔器議刑衆心復搖帝曰朕幾為器所誤後為  
吏部侍郎御史大夫上元元年病亟叩頭若謝臯狀家  
人問之曰達奚尹訴於我三日卒

毛若虛絳州太平人眉長覆目性殘鷲天寶末為武功  
承年已六十餘肅宗還京師擢監察御史以國用竭數  
請培天下財漸見任用每覆囚先收家貲以定贓並攤  
索保伍姻戚人懼其威無敢不如約乾元中鳳翔七坊  
士數剽劫殺人縣尉謝夷甫不勝怒榜殺之士妻訴李  
輔國輔國請御史孫瑩窮治獄久不具詔中丞崔伯陽  
與三司參訊未決乃使若虛按之即歸罪夷甫伯陽爭  
甚力若虛慢拒伯陽怒若虛馳白帝詔姑出若虛曰臣

出即死因蔽若虛殿中而召伯陽伯陽至具劾若虛罔上帝主先語叱出之遂貶伯陽并官屬嶺外李峴亦以左右瑩等罷相於是若虛威震朝列矣尋擢御史中丞上元元年以罪貶賓化尉死

敬羽河中寶鼎人貌寢甚便辟善候人意補匡城尉朔方節度安思順表為府屬肅宗初擢監察御史以言利幸京師平任遇寢顯作巨枷號劬尾榆囚人多死又仆囚於地以門牡轆腹號肉縛飢掘地實棘蒙以席瀕坎



鞫囚不服則擠之人多濫死累遷御史中丞宗正卿鄭國公李遵坐賄詔羽接之遵肥而羽瘠則引遵危坐小牀痺且仆遵欲伸足羽曰公乃囚我延公坐何可慢遵仆三四徐受所言得贓至數百萬嗣岐王珍謀反詔羽窮劾乃悉召支黨環以榜具囚惶怖一夕獄成珍賜死左衛將軍竇如玠等九人皆斬太子洗馬趙非熊等六七人斃杖下聞者毛豎先是胡人康謙以賈富楊國忠納其金授安南都護領山南東路驛吏疾之誣其通史

朝義羽鞠之謙鬚長三尺明日脫盡膝髀皆碎遂殺之  
没入其貨羽與毛若虛裴昇畢曜同時為御史皆暴忍  
時稱毛敬裴昇未幾昇曜流黔中寶應初羽斥道州刺  
史詔殺之羽聞使者至縗服而逃吏械之臨死袖中出  
牒數番乃吏相告訐狀曰恨不及推究其事治州者無  
宜寢也

金

高閭山


富察和卓

高閻山澄州析木人選充護衛累遷汝單二州刺史制  
禁不依法用杖決人者閻山笑曰此亦難行特用大杖  
杖死部民楊仙削官解職降鳳翔治中歷原濟泗三州  
刺史改鄭州防禦使遷扶餘路節度使移臨海盤安寧  
昌軍貞祐二年城破死之

富察和卓以吏起身久為宣宗所信聲勢烜赫性復殘  
刻人知其蠹國而莫敢言其子充護衛先逐出之繼而  
和卓為恒州刺史需次近縣元兵入陝西關中震動或

言和卓赴恒州為北走計朝廷命羈其親屬和卓出怨言曰殺却我即太平矣尋為御史所劾斬於開封府門當時有宣朝三賊之目謂王阿里富察耀珠及和卓與定中布薩阿哈之獄京師宣勘七十餘所阿里輩乘時肆毒朝士惴惴莫克自保耀珠正大初致仕居睢陽潰軍變與其家皆被殺初宣宗喜刑罰朝士往往被笞楚至用刀杖決殺言者高琪用事威刑自恣南渡後習以成風如圖克坦思忠好用麻椎擊人號麻椎相公李特

立號半截劔馮璧號馮劓雷淵為御史至蔡州杖殺五  
百人號雷半千又有完顏莽伊蘇皆以酷聞而和卓王  
阿里李渙之徒胥吏中尤狡刻者也



欽定續通志卷五百三十五

欽定四庫全書

史部

欽定續通志卷五百三十六

七

侍講學士臣羅國俊覆勛

總校官原任侍講臣王燕緒

欽定四庫全書

欽定續通志卷五十三

孔氏後裔傳

臣等謹按鄭樵通志沿前史之舊其於至聖後裔若孔安國諸人散見累代列傳中我

朝重道尊師邁越前古既於明史特立行聖公傳今以續纂通志

命輯孔子後裔傳用表章聖人之後炳炳麟麟累代史

中皆有達人傳諸弗替甚

盛典也臣等伏考至聖冢嗣其在宋以前者詳具於

宋史孔宜傳中自宜而下史傳所未詳者則有闕  
里文獻考等書可資考證唐以來若孔穎達諸人  
或以儒學著或以忠義顯皆卓卓能自表見俱應  
按次編載茲彙輯自唐迄元諸史中之傳參以闕  
里文獻考等書分嫡嗣支屬為二卷各按時代編  
次如左



嫡嗣

唐

孔德倫

崇基

昭遜之

光萱

齊卿

惟暉

策

五代

孔仁玉

宋

孔宜

廷世

聖祐

宗愿

若蒙

若虛

瑞友

金

孔璠 拯 摠 元措

元

孔湏 治 思誠 思晦 克堅

孔德倫兗州曲阜人孔子三十三代孫孔子生鯉字伯

魚鯉生伋字子思伋生白字子上白生求 按宋史作永今據東都事

畧及闕里文 獻考改正 字子家求生箕字子京為魏相箕生穿字

子高穿生謙 史記作慎 字子順謙生長子鮒字子魚秦始皇

時藏家語論語尚書孝經於祖堂舊壁中自隱嵩山 按闕

里文獻考鮒生隨字子元隨之子及孫曾皆失考其五世孫名吉漢成帝時封為殷紹嘉侯尋進爵為公平帝時更封為宋公子何齊嗣封何齊子安光武時封為殷紹嘉公尋復封為宋公後無嗣罷封 次子騰

字子襄漢高帝十二年過魯以太牢祀孔子封騰為奉

祠君惠帝時徵為博士遷長沙太傅騰生忠字子貞

按宋

史作騰生正字季忠今據東都事畧及闕里文獻考改正文帝時徵為博士忠生武

及安國

按宋史作武生延年及安國是以安國為武之次子也今據闕里文獻考訂正

武字子

威為文帝博士武生延年武帝時為博士轉太傅遷大

將軍延年生霸字次孺從夏侯勝治尚書昭帝時為博

士宣帝時以大中大夫授太子經遷詹事出為高密相  
元帝即位拜太師賜爵關內侯食邑八百戶號褒成君  
上書求奉先聖祀詔以所食邑祀孔子霸為人謙退卒  
贈列侯謚曰烈霸生福成帝時襲封關內侯福生房哀  
帝時襲封關內侯房生均字長平好學有才襲封關內  
侯徵拜尚書郎平帝元始元年晉封褒成侯食邑二千  
戶奉孔子祀追謚孔子為褒成宣尼公王莽以均為太  
尉三上書辭疾得還遂失爵後漢世祖建武十四年復

封均子志為褒成侯食邑如故卒贈元成志生損襲爵  
和帝永元四年徙封損為褒亭侯邑千戶損生曜字君  
曜嗣侯曜卒子完嗣邑百戶完卒無子以弟讚之子  
羨襲爵羨字子餘仕魏為議郎黃初二年封宗聖侯邑  
百戶羨生震字伯起晉武帝泰始三年改封奉聖亭侯  
邑二百戶拜太常卿黃門侍郎震生嶷字成功襲封奉  
聖亭侯嶷生撫舉孝廉辟太尉掾為豫章太守襲封奉  
聖亭侯撫生懿襲封奉聖亭侯兼從事中郎懿生鮮字

鮮之有度量好學宋文帝元嘉十九年襲封奉聖亭侯  
改封崇聖侯鮮生乘字敬山博學有才藝後魏孝文帝  
延興初舉孝廉三年封乘為崇聖大夫復十戶以供灑  
掃乘生靈珍任魏為秘書郎孝文帝太和十九年詔封  
靈珍崇聖侯邑百戶靈珍卒子文泰襲文泰卒子渠襲  
渠卒子長孫襲北齊文宣帝天保元年改封恭聖侯邑  
百戶後周宣帝大象二年詔追封孔子為鄒國公遂詔  
長孫承襲鄒國公長孫子嗣愨隋文帝時應制登科授

涇州司兵參軍遷太子通事舍人煬帝大業四年詔封  
嗣愨紹聖侯邑百戶嗣愨生德倫唐高祖武德九年詔  
封為褒聖侯太宗貞觀十一年詔褒聖侯朝會位同三  
品食邑百戶中宗嗣聖七年賜敕書及時服卒子二崇  
基子歎

崇基中宗嗣聖十二年襲封褒聖侯神龍元年授朝散  
大夫陪祭朝會卒子璵之

璵之字藏暉元宗開元五年襲封褒聖侯授國子四門

博士邠王府文學蔡州長史二十七年詔謚孔子曰文  
宣王進封璿之為文宣公兼兗州長史尋遷都水使者  
天寶之亂寄居寧陵卒遂葬於寧陵子孫家焉子萱  
萱襲封文宣公兼兗州泗水令卒子齊卿

齊卿德宗建中三年襲封文宣公兼兗州功曹轉青州  
司兵參軍時遭叛亂陷於東平子三惟晔惟昉惟時  
惟晔初居寧陵後兵解歸魯留幼弟惟時居寧陵守先  
人墓憲宗元和十三年襲封文宣公授兗州參軍卒子



策

策明經及第授曲阜縣尉武宗會昌元年累遷尚書博士二年襲封文宣公宣宗大中元年宰相白敏中奏歲給封戶絹百匹春秋充享祀卒子三振極郁

振字國文懿宗咸通四年進士第一人及第除秘書省校書郎累遷左補闕水部員外郎襲封文宣公卒子昭儉

昭儉任南陵尉授廣文館博士兗州司馬賜緋除秘書

郎襲封文宣公魚曲阜令卒子光嗣

光嗣昭宗天祐二年授泗水主簿遭世叛亂遂失封爵  
初宋元嘉間蠲魯郡民孔景等五戶供孔子廟灑掃役  
其裔孫末見孔氏子孫單承門祚衰弱又多流寓他所  
者乘時不綱謀冒聖裔竊世爵遂計害光嗣時梁末帝

乾化三年也子仁玉

按德倫至光嗣新舊唐書俱無傳  
今據宋史孔宜傳參闕里文獻考

補輯

仁玉字溫如當孔末之亂仁玉生甫九月母張抱匿於

外家九歲通春秋既長姿貌雄偉為人嚴整臨事有果  
斷後唐明宗長興元年魯人愬于官曰曲阜令未非聖  
人後光嗣有子仁玉育于張氏今十九歲矣事聞于朝  
乃誅末以仁玉主孔子祀授曲阜主簿三年遷龔邱令  
封文宣公晉高祖天福五年改曲阜令後周太祖廣順  
二年帝幸曲阜謁林廟召對賜五品服及銀器雜綵詔  
以曲阜令兼監察御史卒贈兵部尚書後人以孔氏幾  
絕復興實賴張氏之力歲時祭其外祖張溫之墓為置

祭田立奉祀生請蠲其徭役以報之子四宜憲冕勛

按五

代史無仁玉傳今據宋史孔

宜傳及闕里文獻考補輯

宜字不疑幼穎悟十歲能屬文以考聞舉進士不第宋  
太祖乾德四年詣闕上書述其家世詔以為曲阜主簿  
歷黃州軍事推官太宗即位召見遷司農寺丞掌星子  
鎮市征宜上言星子當江湖之會商賈所集請建為軍  
詔以為縣就命宜知縣事後以為南康軍代還獻所著  
文賦數十篇太宗嘉之召見問以孔子世嗣因下詔曰

素王之道百代所崇傳祚襲封抑存典制文宣王四十  
四代孫司農寺丞宜服勤素業砥礪廉隅亟歷官聯洽  
聞政績聖人之後世德不衰俾登朝倫以光儒胄可擢  
太子右贊善大夫襲封文宣公復其家未幾通判密州  
太平興國八年詔修曲阜孔子廟宜貢方物為謝詔褒  
之遷殿中丞雍熙三年用兵契丹受詔督軍糧溺拒馬  
河卒子三延世延澤延渥宜弟憲太平興國二年進士  
及第官至工部員外郎知浚儀縣冤應城主簿

按闕里  
文獻考

作兗州  
參軍

勗詳子道輔傳中

延世字茂先以父死事賜學究出身為曲阜主簿歷闕  
長葛二令真宗至道三年召赴闕以為曲阜令襲封文  
宣公賜帛五十匹銀器五十兩及太宗御書并九經咸  
平三年詔本道轉運使本州長吏待以賓禮卒于官子

聖祐

聖祐年九歲賜同學究出身大中祥符元年真宗東封  
泰山聖祐時年十一賜衣綠陪位綴京官班後及還至

兗州幸曲阜謁孔子廟行酌獻禮孔氏宗屬並令陪位  
又謁孔林御北亭召從臣觀古碑加謚孔子為元聖文  
宣王追封孔子父叔梁紇齊國公母顏氏魯國太夫人  
擢聖祐為太常寺奉禮郎又錄其近屬進士謂同三傳  
出身習進士延祐習學究延渥延魯延齡並同學究出  
身改曲阜為仙源縣聖祐後改大理評事天禧五年授

光祿寺丞襲封文宣公知仙源縣事後改名佑

按聖祐東都事

畧及關里文獻考俱作聖佑宋史所謂後改名佑者當是改名聖佑也

遷太子中舍卒無

嗣以從弟宗愿襲爵

宗愿字子莊父延澤贈諫議大夫仁宗天聖中以從父  
道輔蔭補太廟齋郎寶元二年授國子監主簿襲封文  
宣公知仙源縣事至和二年改封衍聖公遷尚書比部  
員外郎通判濰州卒于官子四若蒙若虛若愚若拙

若蒙字公明神宗熙寧元年襲封衍聖公為仙源縣主  
薄哲宗元祐元年授承奉郎改封奉聖公專主祀事不  
預他職遇郊祀大禮赴闕陪位元符元年坐事廢以弟



若虛襲子二端友端操

若虛字公實襲封奉聖公徽宗崇寧中卒復改奉聖公  
為衍聖公仍以若蒙之子端友紹封

端友字子交徽宗崇寧三年襲封衍聖公宣和三年轉  
通直郎除直祕閣賜緋高宗建炎二年赴揚州陪位不  
克歸遂寓于三衢終郴州知州卒無子以弟端操之幼  
子玠嗣

玠字錫老高宗紹興二年襲封衍聖公卒子搢嗣

卷五十三  
指字季紳高宗紹興二十四年授右承奉郎襲封衍聖公卒子文遠嗣

文遠字紹先光宗紹熙四年授承奉郎襲封衍聖公卒子萬春嗣

萬春字者年理宗寶慶二年襲封衍聖公卒子洙嗣

洙字景清理宗紹定四年襲封衍聖公通判吉州宋亡歸元元世祖命議孔氏子孫當立者或言孔氏子孫寓衢者乃其宗子至元十九年冬召至闕勞問洙遜於居

曲阜者帝嘉之曰寧違榮而不違親真聖人後也遂命  
為國子祭酒承務郎兼提舉浙東學校事與護持林廟  
璽書秩滿再授奉訓大夫儒學提舉卒無嗣自端友至  
洙襲封于衢者蓋六世云

按宜至聖祐俱見宋史孔宜  
傳宗應見東都事畧若蒙以

下並據闕里  
文獻考補輯

孔璠字文老孔子四十九代孫宋朝奉郎襲封衍聖公  
端友弟端操之子劉豫授為迪功郎襲封衍聖公主管  
祀事天會十五年劉豫廢熙宗即位興制度禮樂立孔

子廟於上京天眷三年詔求孔子後加璠承奉郎襲封  
衍聖公奉祀事是時熙宗雅愛讀論語尚書春秋左氏  
傳及諸史通歷唐律乙夜乃罷皇統元年三月帝謁奠  
孔子廟北面再拜顧謂侍臣曰朕幼年游俠不知志學  
歲月逾邁深以為悔大凡為善不可不勉孔子雖無位  
其道可尊萬世高仰如此皇統三年璠卒贈榮祿大夫  
子拯襲封

拯字元濟熙宗皇統二年授文林郎襲封衍聖公海陵

天德二年定衍聖公俸格加于常品是歲立國子監久之加拯承直郎世宗大定元年卒弟摠襲封

摠字元會大定三年授文林郎襲封衍聖公二十年召至京師欲與之官尚書省奏摠主先聖祀事若加任使守奉有闕乃授曲阜縣令進奉直大夫章宗明昌元年卒贈光祿大夫子元措元絃

元措字夢得初父摠年已四十生數子皆不育及宰曲阜收葬枯骨夜夢衆人來謝一人稍前曰嗟哉暮雲之

弗及既寤又搜得十餘骸并葬之已復夢其人來謝曰  
今予非爾子後丑年庚月丁日所生真爾子矣當名元  
措已果得子因即以名之而字夢得

據闕里文  
獻考增

明昌二

年襲封衍聖公詔曰衍聖公視四品階止八品不稱可  
超遷中議大夫永著于今四年八月章宗行釋奠禮北  
面再拜親王百官六學生員陪位承安二年詔元措兼  
曲阜縣令仍世襲元措歷事宣宗哀宗累遷光祿大夫  
太常卿

據闕里文  
獻考增

後歸元太宗仍襲封衍聖公卒無子

以弟元紘之孫湏嗣爵

湏字昭度祖元紘敦厚慎默仕金至安遠大將軍武昌  
節度判官父之固湏于元憲宗元年襲封行聖公喜較  
獵二年曲阜管民長官孔治率族人以不事儒雅攻之  
遂奪爵後知濰州無子世爵在北者中絕絕四十三年  
至成宗即位以治紹封

治字世安六世祖若愚字公直四十六代行聖公宗愿  
第三子也五世祖瑞立字子植金時權主祀事高祖琥

字西老曾祖拂字文通並授進義校尉祖元用字俊卿  
金宣宗時行聖公元措赴汴以元用代攝祀事元師攻  
益都以元用有將畧授以兵使隨征尋卒于軍父之全  
字工叔以迪功郎為曲阜縣尹治于世祖中統元年襲  
縣尹四年權主祀事至元十三年授承事郎宰曲阜二  
十餘年以才幹聞二十二年授奉訓大夫單州防禦使  
以其子思誠代為曲阜尹將行戒其子曰毋妄怒輕笞  
楚人邑中長者視之如父兄幼者撫之如子弟以無負



乃父訓及至單州興學校正風俗聽訟平允人自不寃  
二十九年遷奉直大夫知密州成宗元真元年起闕大  
臣言治孔子裔孫其祖元用有軍功没于王事治權奉  
祖事三十餘年襲封爵莫宜治詔從之授中議大夫襲  
封衍聖公卒子思誠嗣

思誠以世襲縣尹襲公爵尋以非嫡罷封止世襲縣尹  
遷國子監丞安慶路推官升知恩州丁內艱不赴尋拜  
江南湖北道肅政廉訪司僉事皆不赴以朝列大夫知

濮州致仕清勤奉職所至皆有名子克欽世襲曲阜尹

按湏及治思誠元史俱無  
傳今據闕里文獻考補輯

思晦字明道孔子五十四代孫進義校尉拂之五世孫  
也曾祖元孝祖之厚贈亞中大夫濟寧路總管輕車都  
尉魯郡侯父浣字日新贈通議大夫禮部尚書輕車都  
尉魯郡侯思晦資質端重性簡默童幼時讀書已識大  
義及長受業導江張璽講求義理于詞章之習薄而弗  
為家貧躬耕以為養雖劇寒暑為學未嘗懈大德中游

京師祭酒耶律有尚欲薦之以母老辭歸母臥疾躬進藥餌衣不解帶居喪勺水不入口者五日至大中舉茂才為范陽儒學教諭延祐初調寧陽學先是兩縣校官率以廩薄不能守職而思晦以儉約自將教養以法比代去學者皆不忍舍之當是時行聖公思誠以支庶襲爵族人不服相與議思晦適長且賢宜襲封爵奉祀事狀上政府事未決仁宗一日問孔子之裔今幾世襲爵為誰廷臣具對曰未定帝親取孔氏譜牒按之曰以嫡

應襲封者思晦也復奚疑特授中議大夫襲封衍聖公  
月俸五百緡賜四品印泰定三年山東廉訪副使王鵬  
南言襲爵上公而階止四品於格弗稱且失尊崇意明  
年陞嘉議大夫至順二年改賜三品印思晦每遇祭祀  
必敬必慎初廟燬于兵後雖葺治而角樓圍牆未備思  
晦竭力營度以復其舊金絲堂壞又一新之祭器禮服  
悉加整飭又以尼山乃毓聖之地故有廟已毀民冒耕  
祭田且百年思晦復其田里請置尼山書院以列于學

官朝廷從之三氏學舊有田三千畝占於豪民子思書院舊有營運錢萬緡貸於民取子錢以供祭祀久之民不輸子錢并負其本思晦皆理而復之聖父舊封齊國公思晦言于朝曰宣聖封王而父爵猶公願加褒崇乃詔加封聖父啟聖王聖母王夫人五季時孔末之後方盛欲以偽滅真害宣聖子孫幾盡至是其裔復欲冒稱宣聖後思晦以為不早辨則真偽久益不可明彼與我不共戴天乃列于族與共拜殿廷可乎遂會族人稽典

故斥之既又重刻宗譜于石而孔氏族裔益明矣元統元年卒有鶴百餘翔其屋上又有神光自東南落其舍北至正中朝廷加贈其官賜謚文肅子克堅

克堅字璟夫襲封衍聖公階嘉議大夫既而進通奉大夫至正十五年召為同知太常禮儀院事拜陝西行臺侍御史遷國子祭酒擢山東肅政廉訪使不赴子希學

襲封衍聖公

按希學以下俱詳  
明史衍聖公傳

欽定續通志卷五百三十六

欽定四庫全書

欽定續通志卷五百三十七

孔氏後裔傳

支屬

唐

孔穎達

孔若思

從父楨  
子至

楨子季誦

孔巢父

從子戡戡戡  
戡子溫業

戡孫鱗

孔述睿

敏行

宋

孔承恭

孔道輔

宗翰

孔宗旦

孔叟

孔文仲

武仲  
平仲

金

孔端甫

孔穎達字仲達冀州衡水人孔子三十二世孫幼就學  
誦記日千餘言闇記三禮義宗及長明服氏春秋傳鄭  
氏尚書詩禮記王氏易善屬文通步歷隋大業初舉明  
經高第授河內郡博士煬帝召天下儒官集東都詔國



子秘書學士與論議穎達為冠又年最少有恥出其下者陰遣客刺之匿楊玄感家得免補太學助教隋亂避地虎牢太宗平洛授文學館學士遷國子博士貞觀初封曲阜縣男轉給事中時帝新即位穎達數以忠言進帝問孔子稱以能問於不能以多問於寡有若無實若虛何謂也對曰此聖人教人謙耳已雖能仍就不能之人以資所未能已雖多仍就寡少之人更資其多內有道外若無中雖實容若虛非特匹夫君德亦然故易稱

蒙以養正明夷以莅衆帝稱善除國子司業歲餘以太  
子右庶子兼司業與諸儒議厯及明堂事多從其說以  
論誤勞加散騎常侍爵為子皇太子令頴達誤孝經章  
句因文以盡箴諷帝知數爭太子失賜黃金一斤絹百  
匹久之拜祭酒仍侍講東宮帝幸太學觀釋菜命頴達  
講經畢上釋奠頌有詔褒美後太子稍不法頴達爭不  
已乳夫人曰太子既長不宜數面折之對曰蒙國厚恩  
雖死不恨劉切愈至後致仕二十二年卒陪葬昭陵贈

太常卿謚曰憲初頴達與顏師古司馬才章王恭王琰等受詔撰五經義訓凡百餘篇號義贊詔改為正義云雖包貫諸家然不能無謬冗博士馬嘉運駁正其失有詔更令裁定功未就永徽二年詔中書門下與國子三館博士弘文館學士考正之於是尚書左僕射于志寧右僕射張行成侍中高季輔就加增損書始布下頴達子志終司業志子惠元力學寡言又為司業累擢太子

諭德三世司業時人美之

業頴達傳新書例於儒學今據國史文獻考改入

孔若思越州山陰人孔子三十六世孫陳吏部尚書與  
四世孫也祖紹安與兄紹新早知名陳亡客居鄆勵志  
於學外兄虞世南曰本朝淪覆吾分湮滅有弟若此知  
不亡矣紹安與孫萬壽皆以文辭稱時謂孫孔隋大業  
末為監察御史高祖討賊河東紹安與夏侯端同監軍  
禮遇尤密帝即位端先歸已而紹安間道走長安帝悅  
擢內史舍人若思早孤其母躬訓教長以博學聞有遺  
以褚遂良書者納一卷焉其人曰是書貴千金何取之

庶答曰審爾此為多矣更還其半擢明經歷庫部郎中  
常曰仕宦至郎中足矣座右置止水一石明自足意中  
宗初敬暉桓彥範當國以若思多識古今凡大政事必  
咨質後行三遷禮部侍郎出為衛州刺史故事以宗室  
為州別駕見刺史驚故不肯致恭若思劾奏別駕李道  
欽請訊狀有詔別駕見刺史致恭自若思始以清白擢  
銀青光祿大夫賜絹百匹累封梁郡公開元七年卒謚  
曰忠從父禎

按闕里文  
獻考作禎

第進士歷監監察御史門無賓

謁時稱其介高宗時再遷絳州刺史封武昌縣子謚曰

溫禎子季調

案闕里文獻  
考作季翔

永昌初擢制科授秘書郎陳

子昂嘗稱其神清韻遠可比衛玠終左補闕若思子至

字惟微歷著作郎明氏族學與韋述蕭穎士柳沖齊名

誤百家類例以張說等為近世新族剷去之說子均方

有寵怒曰天下族姓何豫若事而妄紛紛耶均弟素善

至以實告初書成示韋述述謂可傳及聞均語懼欲更

增損述曰止丈夫奮筆成一家書奈何因人動搖有死

不可改遂罷時述及穎士冲皆誤類例而至書稱工

若集

忠傳新書列於儒學今  
據開里文獻考改入

孔巢父字弱翁居冀州

按舊書作冀州人巢父為孔  
氏後裔不應稱冀州人今改

孔

子三十七代孫少力學隱徂徠山永王璘稱兵江淮辟

署幕府不應側身潛遁由是知名廣德中李季卿宣撫

江淮薦為左衛兵曹參軍三遷庫部員外郎出為涇原

行軍司馬累拜湖南觀察使未行會普王為荆襄副元

帥署行軍司馬俄而德宗狩奉天擢給事中為河中陝

華等州招討使累上破賊方畧帝嘉納未幾兼御史大夫為魏博宣慰使巢父辯而才及見田悅與言君臣大義利害逆順開曉其衆是時悅久不臣下皆厭亂雜然喜曰不圖今日還為王人酒中悅起自誇工騎射曰陛下見用何敵不推巢父曰若爾不早自歸乃一劇賊耳悅曰能為劇賊豈不能為功臣乎巢父曰國方多虞待子而息悅謝焉數日田緒殺悅與大將邢曹俊等聽命巢父即以緒權知軍務紓其難李懷光據河中帝復令



巢父宣慰罷其兵以太子太保授之懷光素服待命巢父弗止之衆忿曰太尉無官矣方宣詔乃譟而合害巢父并殺中人啖守盈初巢父至懷光以其使魏博而田悅死疑謀出巢父故軍亂不肯救帝聞震悼贈尚書左僕射謚曰忠詔具禮收葬賜其家粟帛存卹之從子戡

戡戡

按巢父以下至溫業各傳新書列於列傳今據闕里文獻考改入

戡字勝始

按舊書云巢父兄米父之子

進士及第補修武尉以大理

評事佐昭義李長榮節度府長榮死盧從史自別將代

之留署掌書記從史稍得志益驕與王承宗田緒陰相  
結欲久連兵以固其位戡始陰爭不從則於會揚言以  
折之從史始若受其言後偃蹇不軌戡遂以疾歸洛陽  
未幾李吉甫鎮揚州表置幕府戡未應從史曰是欲舍  
我而從人邪即誣以事奏三上詔以衛尉丞分司東都  
自貞元後帥鎮劾奏僚佐不驗輒斥至是給事中呂元  
膺執不可憲宗遣使諭曰朕非不知戡行用之矣未幾  
卒從史敗追贈司勳員外郎

殘字君嚴

按舊書孔緯傳云曾祖本父位終秘書省著作佐郎緯為殘之孫則殘乃本父之子也

擢進士第鄭滑盧羣辟為判官羣卒攝總留務監軍楊志謙頗自肆殘邀志謙至府與對榻臥起示不疑志謙嚴憚不敢動入為侍御史累擢諫議大夫條上四事一多冗官二吏不奉法三百姓田不盡墾四山澤權酷為州縣弊憲宗嘉納之中人劉希光受賕二十萬緡抵死吐突承璀坐厚善責授淮南監軍太子舍人李涉知帝意投匭上言承璀有功不可棄殘得副章不肯受面質

讓之涉更因左右以聞戮劾奏涉結近倖罔上聽詔斥

涉峽州司馬

舊書作陝州司倉

宦寵側目人為危之戮自以適

所志軒軒甚得俄兼太子侍讀改給事中江西觀察使

李少和坐贓獄寢不下博陵崔易簡殺從父兄鞠狀具

京兆尹左右之翻其情戮慷慨論正貶少和殺易簡奪

尹三月俸再遷尚書左丞信州刺史李位好黃老數祠

禱部將韋岳告位集方士圖不軌監軍高重謙上急變

捕位劾禁中戮奏刺史有罪不容繫仗內請付有司詔

送御史臺戮與三司雜治無反狀岳坐誣罔誅貶位建  
州司馬中人愈怒出為華州刺史明州歲貢淡菜蚶蛤  
之屬戮以為自海抵京師遞役凡四十三萬人奏罷之  
歷大理卿國子祭酒會嶺南節度使崔詠死帝謂裴度  
曰嘗論罷蚶菜者誰歟今安在是可徃為朕求之度以  
戮對即拜嶺南節度使既至免屬州逋負十八萬緡米  
八萬斛黃金稅歲八百兩先是屬刺史俸率三萬又不  
時給皆取部中自衣食戮乃倍其俸約不得為貪暴稍

以法繩之南方鬻口為貨掠人為奴婢戮峻為之禁士  
之斥南不能北歸與有罪之後百餘族才可用者用之  
其窮而無告者為嫁遣其女子蕃舶泊步有下破稅始  
至有閱貨宴所餉屏排下及僕隸戮禁絕無所求索舊  
制海商死者官籍其貲滿三月無妻子請府則沒入戮

以海道歲一徃復苟有驗者不為限悉推與

按舊書云  
先是準

詔禱南海神多令從事代祠戮每受詔自  
犯風波而徃韓愈在潮州作詩以美之

自貞元中黃

洞諸蠻叛久不平容桂二管利虜掠幸有功乃請合兵

討之。戮固言不可。帝不聽。大發江湖兵會二管入討。士  
被瘴毒死者不勝計。安南乘之殺都護李象古而桂管  
裴行立容管陽巽皆無功。憂死。獨戮不務邀功。交廣晏  
然。大治。穆宗立以吏部侍郎召。

按舊書作敬宗即位召  
為吏部侍郎又稱長慶

中政右散騎常侍卒於長慶四年長慶係穆  
宗年號則是戮未逮事敬宗今從新書纂輯改右散騎

常侍還為左丞以老自乞。雅善韓愈。愈謂曰：公尚壯上  
三留何去之？果戮曰：吾豈要君者？吾年一宜去。吾為左  
丞不能進退。即官二宜去。愈曰：公無留資何恃而歸？曰：

吾負二宜去尚奚顧愈嗟嘆即上疏言臣與幾同在南  
省數與幾相見其為人守節清苦論議正平年七十筋  
力耳目未衰憂國忘家用意至到如幾輩在朝不過三  
數人陛下不宜苟順其求不留自助也禮大夫七十致  
仕若不得謝則賜之几杖安車不必七十盡許致仕令  
幾據禮求退陛下若不聽許亦無傷義而有留賢之美  
不報以禮部尚書致仕歲致羊酒如漢徵士禮長慶四  
年卒贈兵部尚書謚曰貞子遵儒溫裕皆登進士第大



中以後迭居顯職温裕位京兆尹天平軍節度使

據舊書增

輯  
遵孺子緯

緯字化文少孤依諸父多與有名者游才譽早成擢進士第東州崔慎由表置幕府從崔鉉淮南復從慎由守河中再遷觀察判官宰相楊牧薦以長安尉直弘文館遷監察御史進禮部員外郎兼集賢院直學士母喪解還為右司員外郎趙隱言其才拜翰林學士俄知制誥頻遷戶部侍郎擢御史中丞緯方雅疾惡若讐中外聞

風未繩輒肅三遷吏部侍郎權要私謁書牘至盈几一  
不省當路不悅改太常卿從僖宗至蜀以刑部尚書判  
戶部蕭遘雅不喜坐調度不給改太子少保及帝避朱  
玟次陳倉惟倉門衛士數百扈乘輿詔拜緯御史大夫  
令趣百官至行在時羣臣露次盤屋為盜剽脅衣囊畧  
盡緯謁宰相欲有所論遘與裴澈怨田令孜在帝左右  
不欲行辭不見緯召御史曰吾等身被國恩諠不辭難  
今詔羣臣皆不至夫與人布衣游猶緩急相卹況於君

乎且泣下御史亦辭方寇敗丐衣食請辦一日費而行  
緯曰吾妻疾旦暮盡丈夫豈以家事後國事乎公善自  
謀吾行決矣徃見李昌符曰詔書再至而羣臣顧未行  
僕大夫也不敢後願假兵護送天子所昌符具資裝送  
之既及行在緯策攻必反建言關邑阨狹不足駐六師  
請幸梁州即日去陳倉而攻兵至微緯言幾不脫進拜  
兵部侍郎同中書門下平章事攻平從帝還領諸道鹽  
鐵轉運使累遷尚書左僕射賜號持危啓運保乂功臣

鐵卷怒十死又賜天興良田善和里第各一區兼京畿  
營田使昭宗即位進司空以太學焚殘命兼國子祭酒  
完治之加司徒封魯國公進兼太保時天武都頭李順  
節疏暴人也以浙西節度使兼平章事臺史白已謝當  
班見百官緯判止之明日順節盛服至則無班快快去  
他日見緯以為言緯曰固疑公見望也且百辟卿士天  
子廷臣班見宰相以宰相為之長公提天武健免據堂受  
禮安乎必欲用之去都頭乃可順節慙縮不敢言張滌

將伐太原帝不決以問緯緯助濬請既濬敗坐傳會出  
為荆南節度使又貶均州刺史尋有詔聽所便乃屏居  
華陰李茂貞入殺韋昭度帝惡大臣朋比與藩臣交特  
召緯入朝擢吏部尚書以司空門下侍郎復輔政使者  
敦歡力疾到京師見帝嗚咽流涕自陳衰疾不任事乞  
歸田里帝動容詔使者送緯至堂視事會天子出次石  
門從至莎城以疾還都家人召醫視緯曰天下方亂何  
久求生不肯服藥卒贈太尉子崇弼亦登進士仕至散

騎常侍

戢字方舉戢母弟也以季父巢父死難德宗嘉其忠詔與一子正員官授戢修武尉不受以讓其兄戢擢明經書判入高等授校書郎陽翟尉累遷殿中侍御史分司東都昭義判官徐孜故嘗助盧從史為跋扈者從史敗孟元陽代欲復用之戢遂牒澤潞收孜以俟命然後列狀上聞詔流孜播州轉侍御史庫部員外郎初涇師之亂朱泚以彭偃為中書舍人至是偃子充符為鄜坊從

事或薦其能召還京師戢謂京兆裴武曰此所下偽詔  
皆偃為之逆臣子不烏窟獸伏乃干譽求進乎子盍效  
季孫行父逐莒僕以勉事君者武即逐出充符拜京兆  
少尹再遷為湖南觀察使召授右散騎常侍京兆尹歲  
旱文宗憂甚戢躬祠曲江池一夕大澍帝悅詔兼御史  
大夫太和三年卒贈工部尚書子溫業

溫業字遜志擢進士第大中時為吏部侍郎求外遷宰  
相白敏中顧同列曰吾等可少警孔吏部不樂居朝矣

後為太子賓客子晦

孔述睿越州山陰人孔子三十八代孫梁侍中休源八世孫也曾祖昌寓字廣成貞觀中對策高第歷魏州司馬有治狀帝為不置刺史為政三年璽書褒美進膳部郎中祖祖舜字奉先為監察御史以累下除成武令雉馴子廷述睿少與兄充符弟充讓篤孝既孤借隱嵩山而述睿資嗜學大歷中劉晏薦於代宗以太常寺協律郎召累擢司勳員外郎史館修撰述睿每一遷即至朝



謝俄而辭疾歸以為常德宗立拜諫議大夫命河南尹  
趙惠伯齋詔書束帛敦遣既至對別殿賜第宅給廩馬  
兼皇太子侍讀固辭弗許久乃改秘書少監兼右庶子  
復為史館修撰述睿重次地理志本末最詳性退讓未  
始忤物雖親朋燕集嚴默終日與金狐峒同職峒數抵  
侮然卒不校也時稱長者貞元四年帝念平涼之難以  
求睿慈誠遣持祠具稱詔臨祭九年又以疾乞解久乃  
許以太子賓客還鄉故事致仕不給公驛帝特命給馬

卒贈工部尚書子敏行字至之元和初擢進士第岳鄂  
呂元膺表在節度府元膺徙東都河中輒隨府遷入拜  
右拾遺四遷司勳郎中集賢殿學士諫議大夫李絳遇  
害事本監卑揚叔元時無敢言敏行上書極論之叔元  
巧得罪敏行少修潔及仕宦能交當時豪俊有名一時

太和九年卒贈工部侍郎

按孔述感傳新書列於隱  
通今補闕里文獻考改入

孔承恭字光祖孔子四十三代孫本京兆萬年人唐昭  
宗東遷舉族隨之遂占籍河南五世祖戡自有傳戡孫

迴萊州刺史迴子昌庶虞部郎中昌庶子莊仕晉為右  
諫議大夫由戡至莊皆登進士第承恭莊之子也以門  
蔭授秘書省正字歷溫安豐二縣主簿時王審琦節度  
壽春以承恭名家子奏攝節度推官府罷調補鄭州錄  
事參軍入為大理寺丞獻宮詞托意求進太祖怒其引  
喻非宜免所居官放歸田里太宗即位以赦復授舊官  
時初擁酒以承恭監西京酒麴歲增課六千萬遷大理  
正議獄平允擢庫部員外郎判大理少卿事歷屯田兵

部郎中同考校京朝官課第端拱三年下詔曰九寺三  
監國之羽儀制度聲名往往而在各有副貳率其司存  
品秩素高職任尤重郎史遷授斯為舊章比聞搢紳之  
流頗以臺閣自許目為散地甚無謂焉朕將振之自我  
而始其以兵部郎中孔承蒼為太常少卿魏羽為秘書  
少卿戶部郎中柴成務為光祿少卿魏庠為衛尉少卿  
張洎為太僕少卿呂端為大理少卿臧丙為司農少卿  
袁廓為鴻臚少卿工部郎中張雍為太府少卿又以屯

田郎中雷有終為少府少監虞部郎中索湘為將作少  
監時裴祚慎從吉宋雍先為少卿皆改授東宮官又詔  
承恭與左散騎常侍徐鉉刊正道書俄以疾求解官且  
言早遊嵩少間樂其風土願卜居焉帝召見憫其羸瘵  
授將作監致仕以其子玠同學究出身為登封縣尉俾  
就祿養未果行而卒承恭少疎縱及長能折節自勵嘗  
上疏請令州縣長吏詢訪耆老求知民間疾苦吏治得  
失及舉令文賤避貴少避長輕避重去避來請詔京兆

并諸州於要害處設木牌刻其字違者論如律帝皆為

行之

案承恭傳宋史列於列傳  
今據關里文獻考改入

孔道輔字原魯初名延魯孔子四十五代孫也父勗進士及第為太平州推官以殿中丞道判廣州會真宗東封躬詣孔子祠帝問宰相孔氏今孰為名者或言勗有治行即召對以為太常博士知曲阜縣初勗在廣州以清潔聞及被召蕃酋爭持寶貨以獻皆慰遣之後為御史臺推直官累遷祕書監分司南京管勾祖廟以尚書

工部侍郎致仕後道輔卒年八十九道輔幼端重大中  
祥符五年進士及第為寧州軍事推官數與州將爭事  
有蛇出天慶觀真武殿中一郡以為神州將帥官屬往  
奠拜之欲上其事道輔徑前以笏擊蛇碎其首觀者初  
驚後莫不歎服遷大理寺丞知仙源縣主孔子祠事上  
言廟制卑陋請加修崇詔可再遷太常博士莊獻太后  
臨朝召為左正言受命日論奏樞密使曹利用尚御藥  
雖崇勲竊弄威柄宜早斥去以清朝廷

按東都事畧云  
道輔請太后歸

政天子宋史本傳不載

太后可其言乃退未幾為直史館判三司理欠憑由司使遼道除右司諫龍圖閣待制遼宴使者優人以文宣王為戲道輔艷然徑出遼使主客者邀道輔還坐且令謝之道輔正色曰我國與北朝通好以禮文相接今俳優之徒慢侮先聖而不之禁北朝之過也道輔何謝遼君臣默然又酌大卮謂曰方天寒飲此可以致和氣道輔曰不和固無害既還言者以為生事仁宗問其故對曰平時使者至遼為所侮若不較恐益慢



我朝帝然之歷判吏部流內銓糾察在京刑獄坐糾事  
不當出知郟州徙青州還判流內銓遷尚書兵部員外  
郎復出知徐許二州徙應天府明道二年召為右諫議  
大夫權御史中丞以諫廢郭后出知泰州徙徐州又徙  
兗州進龍圖閣直學士遷給事中在兗三年復入為御  
史中丞道輔性鯁挺遇事彈劾無所避及再執憲權貴  
益忌之初道輔與父儼郭贄舊宅居之有言於帝者曰  
道輔家近太廟出入傳呼非所以尊神明即詔道輔他

徙集賢校理張宗古上言漢內史府在太廟垣垣中國朝以來廟垣下皆有官私地合謂不須避帝出宗古通判萊州道輔歎曰儉人之言入矣會受詔鞠馮士元獄事連參知政事程琳宰相張士遜素惡琳而疾道輔不附已將逐之察帝有不悅琳意即謂道輔上顧程公厚今為小人所誣見上為辨之道輔入對言琳罪薄不足深治帝果怒以道輔朋黨大臣出知鄆州已而道輔知為士遜所賣頗憤惋時大寒上道行至韋城病卒皇祐

三年王素因對語及道輔仁宗思其忠特贈尚書工部  
侍郎子宗翰

宗翰字周翰登進士第知仙源縣為治有條理遇族人  
有恩不以私故亂法王珪司馬光皆上章論薦由通判  
陵州為夔峽轉運判官提點京東刑獄知虔州城濱章  
貢兩江歲為水齧宗翰伐石為址治鐵錮之由是屹然  
歷陝揚洪兗州皆以治聞哲宗初立求言吏民上書以  
千數詔司馬光采閱其可用者十五人獨稱獎其二乃

宗翰與王鞏也元祐初召為司農少卿遷鴻臚卿言孔子之後自漢以來有褒成奉聖之號皆賜實封或繡帛以奉先祀國朝益加崇禮真宗賜世襲然兼領他官不在故郡請自今襲封者終身在鄉里詔改為奉聖公不領他職

按東都事畧云仁宗封孔子後為衍聖公哲宗時改為奉聖公徽宗時復為衍聖公

給廟

學田萬畝賜國子監書立學官以誨其子弟進刑部侍郎屬疾求去以寶文閣侍制知徐州未拜而卒

按道輔傳宋史

列於列傳今據闕里文獻考改入

孔宗旦魯人孔子四十六代孫祖冕父延齡宗旦為邕州司戶參軍儂智高未反時邕州有白氣起郡庭旁江水暴溢宗旦以為兵象度智高必反以書告知州陳珙珙不聽後智高破橫州即載其親往桂州曰吾有官守不得去無為俱死也既而州破被執賊欲任以事宗旦叱賊且大罵遂被害知袁州祖無擇以其事聞贈太子

中允

案宗旦傳宋史列於忠義今據關里文獻考改入

孔攷字寧極孔子四十六代孫隱居汝州龍興縣龍山

之潢陽城性孤潔喜讀書有田數百畝賦稅常為鄉里  
先遇歲饑分所餘賙不足者聞人之善若出於已動止  
必依禮法環所居百餘里人皆愛慕之見取於路輒斂  
衽以避葬其父廬墓三年日食米一溢壁間生紫芝數  
十本州以行義聞賜粟帛給復其家近臣列薦授秘書  
省校書郎致仕居數年召為國子監直講辭不赴即遷  
光祿寺丞頃之起知龍興縣復辭卒贈太常丞盜嘗入  
取家發其廩粟取避之縱其所取嘗逢羸弱者為盜掠

奪其質。眈追盜與語。責之以義。解金畀之。使歸所掠。居山未嘗逢毒蛇虎豹。或謂之曰。子毋夜行。此亦可畏。眈曰。無心則無所畏。晚年惟玩周易老子他書。亦不復讀。為太玄圖張壁。上外列方州部家。而規其中心。空之曰。易所謂寂然不動者。與此無異也。

按孔眈傳宋史列於隱逸。今據闕里文獻。

考改

孔文仲字經父。居臨江新喻。孔子四十七代孫。舉進士。第一調餘杭尉。恬介自守。不事請謁。轉台州推官。熙寧

初翰林學士范鎮以制舉薦對策九千餘言力論王安石所建理財訓兵之法為非是宋敏求第為異等安石怒奏神宗罷歸故官吳充為相欲置之館閣有忌之者僅得國子直講學者方用王氏經義進取文仲不習其書換為三班主簿出通判保德軍時征西夏衆數十萬皆道境上久不解邊人苦之文仲陳三不便元祐初召為祕書省校書郎進禮部員外郎有言皇族唯揚荆二王得稱皇叔餘宜各系其祖若唐人稱諸王孫之比文仲



曰上新即位宜廣敦睦之義不應踈間骨肉議遂寢遷起居舍人擢左諫議大夫日食七月朔上疏陳五事又論青苗免役首困天下保甲保馬茶鹽之法為遺弊留蠹改中書舍人三年同知貢舉文仲先有寒疾及是晝夜不廢職同院以其形瘵勸之出或居別寢謝曰居官則任其責敢以疾自便乎於是疾益甚還家而卒初文仲與弟武仲平仲皆以文聲起江西時號三孔後追貶梅州別駕元符未復其官有文集五十卷

按文仲傳及武仲平仲二

傳宋史列於列傳今  
撰闕里文獻考改入

武仲字常父舉進士甲科調穀城主簿元祐初為秘書  
省正字稍遷國子司業嘗論科舉之弊詆王氏三經新  
義請復詩賦取士進起居郎兼侍講邇英殿除起居舍  
人數月拜中書舍人直學士院時議祠北郊久不決武  
仲建用純陰之月親祠如神州地祇擢給事中遷禮部  
侍郎以寶文閣待制知洪州請從臣為州者杖以下公  
坐止劾官屬俟獄成聽大理約法庶幾刑不逮貴近又

全朝廷體貌之意遂著為令徙宣州坐元祐黨奪職居  
池州卒元符末追復之所著詩書論語金華講義內外  
制雜文共百餘卷

平仲字義甫登進士第又應制科以呂公著薦為秘書  
丞集賢校理歷京西路提點刑獄紹聖中言者詆其元  
祐時附會當路譏毀先烈刑校理知衡州提舉董必劾  
其不推行常平法陷失官米之直六十萬置獄潭州平  
仲疏言米貯倉五年半陳不堪食若非乘民闕食隨宜

泄之將成棄物矣倘以為非臣不敢逃罪乃徙韶州又以前上書故責惠州別駕安置英州改單州團練副使

饒州居住

按東都事畧平仲自安置英州後又改單州團練副使饒州居住徽宗即位乃自饒州召

還東史失載今據補

徽宗即位召為戶部郎中歷帥鄜延環慶黨

論再起罷主管兗州景靈宮卒所著續世說繹解稗詩戲諸書傳於世

孔端甫孔子四十八代孫明昌初學士党懷英薦其年德俱高讀書樂道該通古學召至京師特賜王澤榜及

第除將仕郎小學教授以主簿奉祀致仕

按端甫見金史孔璠附傳

璠傳已入嫡嗣  
茲摘出另編



欽定續通志卷五百三十七